

վածքը ամբողջապես գրավելու և նրանց իսպառ գրկելու ժառանգության իրավունքից:

16—18-րդ դդ. մեզ հասած բազմաթիվ կալվածագրերում հանդես եկող օտարող կամ գնող կողմերի անվան հիշատակմանը հաճախ նախորդում է «նոր մահմեդական» (զջաղիդ-ուլ-խալամ—جدید الاسلام) տերմինը, որից երեւում է, որ տվյալ անձնավորութիւնը նոր է մահմեդականութիւնը ընդունել: Այդ պարզ երևում է հասկապես այն վավերագրերից, որոնց մեջ նոր մահմեդականութիւնը ընդունած կողմը ժառանգական վեճերով հանդես է գալիս իր այն հարազատների դեմ, որոնք դեռևս պահպանում էին քրիստոնեական հավատը:

Այս առթիվ տրված բազմաթիվ բողոքագրերի և դատական պրոցեսների բավական ստվար գործեր կան պահպանված: Այդ գործերի ուսումնասիրութիւնից պարզվում է, որ, մասնակի բացառութիւններով, ժառանգության խնդրում միշտ էլ առաջնութիւնը տրվում էր մահմեդականութիւնը ընդունած ժառանգներին: Բնորոշ է, որ կենտրոնական Դիվանաւլ-սագարաթի կողմից տրված ֆեթվաներում, որոնք առանց բացառության բոլորն էլ հաստատված են շահական ֆերմաններով, այդ առաջնության հարցը այնքան էլ սուր կերպով չի դրված: Մանավանդ, որ պահպանված վավերագրերը մեծ մասամբ վերաբերում են ոչ անմիջական ժառանգների միջև առաջացած վեճերին: Այնինչ, Երևանի, Նախիջևանի և այլ վայրերի շարիաթական ատյանների ֆեթվաներում, որոնց մեջ քննարկված են նաև անմիջական ժառանգների միջև առաջացած վեճերը, մուսուլման ժառանգներին տրվող առաջնության մոմենտը առանձնապես շեշտված է:

16—17-րդ դդ. հայկական աղբյուրներում ևս կան որոշակի վկայութիւններ այն մասին, որ շատ հաճախ որևէ մահմեդական դիմում էր Շար'ին և մի քանի կեղծ վկաներով «ապացուցում», որ ինքը այսինչ հայի ազգականն է և այդպիսով զավթում նրա ամբողջ ունեցվածքը, կամ նրա մի մասը: Այսպես, օրինակ, Զաքարիա սարկավագը իր «Պատմագրության» Ա. հատորի 42-րդ գլխում պատմում է, թե ինչպես քանաքեռցի ոմն Միքայել եպիսկոպոսի դեմ մի պարսիկ վեճ է սկսում և դիմելով Շար'ին պընդում է, որ ինքը ազգական է նրան, ուստի պետք է նրա հարստութիւնը վերցվի նրանից և տրվի իրեն:

Սկզբում Երևանի Շեյխ-ուլ-խալամը բավարար ապացույցներ չգտնելով մերժում է նրա պահանջը և բազմաթիվ վկաների ստորագրութեամբ կազմում է մի արձանագրութիւն, որով հերքվում է նրանց ազգակցութիւնը: Սակայն հետո պարսիկին հաջողվում է կաշառել Շեյխ-ուլ-խալամին, որը երկրորդ գրութեամբ իրավունք է տալիս նրան սեփականացնել Միքայել եպիսկոպոսի այգին: Իսկ երբ վերջինս նորից բողոքում է շեյխին, նա պատասխանում է, թե «Ես ոչ էի ձգձարտութեամբ վերահասու եղեալ իրացն և այժմ հաւատարիւ ծանեալ, զի ազգական քո է նա, և ըստ օրինաց մերոց զամենայն ինչքն քո նմա պատկանի»¹:

Թեև ի վերջո Միքայել եպիսկոպոսը Կոտայքի մելիք Դավութի միջոցով կարողանում է իր բողոքը տեղ հասցնել և Երևանի Թահմազկուլի խանը տեղեկանալով այն մասին, որ Շեյխը կաշառք է վերցրել ու փոխել իր վճիռը,

¹ Զաքարիա Սարկավագ, Կ. Ա. էջ 73: